



DEO OPTIMO MAXIMO
UNI ET T NINO,

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICA*,
 QUOD LIBERTARIIS DISPUTATIONIBUS
*manè discutienda in Scholis Medicorum, die Jovis decimâ-tertiâ
 mensis Novembris, anno Domini M. DCC. LXXVII.*

M. MARIA-ZOROBABEL MUNIER, Regis in Coloniis Orientalibus
nuper Medico, domûs Regiæ Invalidorum Ducum & Militum Medico à
Rege designato, Doctore Medico, Præside.


An variolarum inflammatio ab omnibus aliis diversa, quod sit inflammatio-crisis,
ac proinde semper fovenda & ad suppurationem perducenda?

L.

DUO præcipua in variolis tempora distingui omnibus Medicis notum est: alterum ebullitionis quod tribus aut quatuor diebus includitur, & in quo febris adest acutior aut remissior: alterum eruptionis, quod ad decem aut ad decem & sex extenditur dies, & in quo febre, aut penitus cessante, aut saltem valdè imminutâ, papulæ moruum pulicarium non absimiles ad corporis ambitum, præsertim ad faciem, ad thoracem, & ad extremitates tam superiores quam inferiores efflorescunt, quæ indefinenter crescendo, donec suum fastigium attigerint, in totidem tubercula immutantur intensè rubentia, calentia, dolentia, in verum pus & in veros abscessus abeuntia. Hi abscessus pure exsiccati

* Autore Ludovico-Alexandro Geryaise.

Vocabulum
CRISIS longaeali
acceptione inter
Medicos sumitur
quam apud vul-
gos. Apud Medi-
cos significat sem-
per evacuationes
salvares quoquo
modo & quaque
via fiunt; & hæ
evacuaciones op-
portet sunt eva-
cuaciones sym-
ptomatis quæ
semper noxiæ
sunt: apud vul-
gos verò crisis
habetur pro au-
gmento agitationis
& quidam tumultus
specie.



duris & crassioribus crustis obducuntur, paucis post diebus faciliè & quasi spontè decidentibus.

Hunc morbum Medici, ab illo tempore quo primum ab Rhaze Medico Arabe observatus est & accuratè descriptus, ad hodiernum usque tempus, uno ore omnes inflammatorium appellaverunt, methodumque inflammationi communi idoneam huic adhibendam suaserunt. Sed si hujusce inflammationis speciem accuratius distinxissent, sique magis ad finientis quam ad incipientis morbi phenomena respexissent, à tam latâ definitione tradendâ abstinuissent, neque, tam generalem curandi methodum instituisent. Cum enim hic morbus constanti, absolute necessariâ, & inevitabili naturæ lege nunquam nisi plenâ suppuratione in sanitatem vertatur, eos haud fugere potuisset, variolarum inflammationem ab omnibus aliis esse diversam, quòd sit *inflammatio-crisis* quæ semper fovenda, sustinenda & ad suppurationem perducenda, & quòd cæteræ inflammationes sint essentielles aut symptomatice, quæ semper retundendæ, à suppuratione defendendæ & ad resolutionem perducendæ. Ut vero hæc diversitas apertior fiat & plenius elucescat, inflammatio communis seu generatim sumpta variolarum inflammationi est comparanda, & utriusque phenomena tam quoad progrediendi modum, quam quoad varios exitus, & diversam curandi rationem attentè sunt examinanda.

I I.

INFLAMMATIO in genere nihil aliud est quam sanguis arteriosus ruber ad extremos vasorum apices retentus & collectus, aut per auctam circulationem in principia arteriarum lymphaticarum fortiter impulsus, ibique infarctum efformans, qui continuam pressionem, continuumque attritum patitur ex reliquo sanguine à tergo semper appellente. Ex hoc infarctu tumor nascitur major aut minor prout majorem aut minorem vasorum quantitatem occupat.

Nunquam paulò validior in corpore nascitur inflammatio, siue interna sit, siue externa, quin febris statim accendatur. Hinc in essentialem & in symptomaticeam inflammatio potest distingui: essentialem rectè appellaveris quæ febrem prægreditur, symptomaticeam verò quæ post natam febrem exoritur, ut & quæ vulneribus, fracturis & variis luxationibus supervenit, siue febrem in sodalitiū accerserit, siue non accerserit. Sed hæc accurata distinctio neque semper possibilis, quia sæpè febris & inflammatio, uno, & eodem impetu simul irruunt, neque absolute necessaria, quia non hinc diversa exurgit curandi ratio, nisi quòd fortè promptiora & efficaciora requirantur auxilia. Ut ut sit, febris & inflammatio sibi mutuas vires suppeditant, quæque proportionem hæc increfcit aut minuitur, eadem etiam illa augetur aut decrefcit, & neutra, quoties evasurus æger, non nisi paulatim extinguitur.

Proximam inflammationis causam agnoscunt Medici vel nimiam sanguinis spissitudinem, vel nimiam vasorum coarctationem, vel simul utramque, & quælibet inflammatio alterutro ex his quatuor exitibus semper terminatur, vel resolutione, vel suppuratione, vel gangrænâ, vel scirrhus.

In resolutione crassus & stagnans cruor paulatim attenuatur, diluitur, & consuetas circulationis vias relegit, vasa quæ erant infarcta deplentur, laxantur, & pars inflammata perfectè sanatur, nullo, ne tantillo quidem prægressæ læsionis, vestigio remanente.

Suppuratio obstruentem materiam, ipsosque vasorum parietes in liquamen quoddam cremori-forme invertit, quod pus appellatur.

Gangræna est humoris infecti, ipsorumque vasorum absoluta corruptio, quæ pars inflammata calore & motu vitali oritur & cadaverosæ ac putrescentis carnis speciem induit.

In schirro denique obstruens materies, diffatis per calorem tenuioribus & aqueis particulis, simulque crassioribus relictis, in duritiem quasi lapideam compingitur, partis organicæ usu penitus pereunte.

Ex hisce quatuor exitibus sola felix optandaque est resolutio, ut quæ sola sanitatem restituat. Tres alii exitus, aut sunt morbi ipsâ inflammatione periculosiores, aut sunt certi mortis mox venturæ prænuntii. Nonne reverà in pleuritide, in peripneumoniâ, in ventriculi, aut alterius cujuscunque visceris inflammatione multò majore periculo laborat æger cujus inflammatio in suppurationem, aut in gangrænam verâ est, quam inflammatione adhuc crudâ? Tota itaque curantis industria eò dirigenda ut suppuratio aliquæ infausti avertantur exitus & ut perfectæ obtineatur resolutio. Hinc quidquid accensum calorem extinguit, sanguinem sicciorum & crassiorum humectat & diluit, vasaque nimis tensa & repleta vacuat & relaxat, in usum est trahendum. Hos scopos Medici sequentibus præcipue auxiliis assequuntur.

1.º Sanguis pluries, properanter, & quandoque fere ad animi deliquium usque est mittendus, præsertim in juvenibus & in viris temperamento sanguineo & æstuoso præditis: sic minuitur plethora, levius fit pondus totius massæ sanguinis, in oppositum obicem arietantis, & vasis sua redditur potestas in liquida contenta agendi, eaque attenuandi & ulterius propellendi.

2.º Imperandi potus aquosi, refrigerantes, resolventes & leviter nitrati, ut quod concretum est diluatur, dissolvatur, fluxilius reddatur. Talia sunt serum lactis aut simplex, aut plantis refrigerantibus incoctis medicatum; decocta ex radicibus acetosæ, fragariæ, liquiritiæ & graminis cum plantis capillaribus; borragine, chærefolio, floribus violarum, rosarum & similibus; decoctum hordei modicè saccharatum & nitratum; emulsiones dilutiores ex seminibus refrigerantibus cum paucò saccharo, succus aurantium aut limonum vel grossulariæ ad gratiam aciditatem in aquâ dilutus & saccharo edulcoratus.

3.º Singulis diebus bis aut ter alvus clysteribus emollientibus & refrigerantibus est tubluenda.

4.º Ipsi partibus inflammatis, aut inflammationi proximis applicandi foci ex decocto plantarum emollientium & resolventium, aut similibus decoctionum vapores ad has partes dirigendi, & pluries repetendi.

5.º Utendum victu tenuissimo, nihilque ægroto concedendum præter juscula valde tenuia ex carne vitulinâ, aut pulli gallinacii quoad majorem partem confecta, paucò nitro addito nec non foliis acetosæ & chærefolii, quæ juscula ad cyathum aut semi-cyathum singulis trihorii sunt exhibenda.

6.º Angue peius fugienda quæcumque motum sanguinis intendere, majoremque in eo ætum accendere apta sunt, ut potiones cardiacæ ex aquis aromaticis & calidis, spiritibus ardentibus, talibus oleoso-volatilibus, confectiõibus calidis & similibus confectæ, nec non vinum merum, tam simplex, quam id in quo aromata ut cinnamomum, nux moschata, zinziber, piper, crocus & similia cum saccharo ebullierint.

Sed quantacumque sit horumce auxiliorum efficacia, hanc longè superant variæ evacuationes criticæ quas natura potens, aut hiæce auxilii adjuncta, in ægotantium levamen non nunquam suscipit. Tales sunt biliothum alvi profluvium aut biliosus vomitus, aut etiam morbus regius debito tempore superveniens in pleuritide.

4

in peripneumoniâ, in hepatide inflammatorio-biliosis, larga sanguinis è naribus eruptio, sudores profusè erumpentes, copiosa & facilis sputorum exspuitio, in iisdem morbis sincerè inflammatoriis quandoque etiam apostemata & bubones aliis in partibus longe distitis erumpentes. Hâc methodo, naturâ & arte sic amicè foederatis & ad eandem metam properantibus, inflammationes quantumvis terrificæ & minaces à suppuratione, gangrænâ & scirrho descendunt & ad resolutionem perducuntur, sanitate in integrum redeunte.

I I I.

VARIOLARUM inflammatio primo quidem intuitu inflammationi communi prorsus similis videtur. Sed quanta inter utramque dissimilitudo! Adest quidem infarctus sanguineus ad extremos valorum apices ut in inflammatione communi; adsunt communia inflammationis symptomata dolor, calor, tumor, rubor; sed ultrâ sanguinis infarctum, ultrâ inflammationis symptomata, adest peculiare quid venenatum, vi tam coagulatoriâ pollens ut se nunquam resolvi patiatur, ut nullâ aliâ ratione quam suppuratione extra corpus possit eliminari. Febris aliarum inflammationum individua est comes, quodque magis hæ intenduntur, eò etiam intensior illa redditur. In variolis vix prima emicant papularum vestigia, cum febris statim mitescit, & quo plenius turgent, eò fit hebetior; in aliis inflammationibus tota curantis industria in eo occupanda ut præcaveatur suppuratio, in variolis è contrâ, ut promoveatur. Si inflammationibus aliis succedat suppuratio, en morbus priori longè periculosior: in variolis, si nulla, aut si imperfecta fiat, quot horrenda & ægrè superabilia se se efferunt symptomata! quàm imminens mortis periculum! aliæ inflammationes, vel gravissimæ, quotidie perfectè resolvuntur; variolarum pustulæ, vel tantillæ, resolutionem nesciunt.

Non minus oppositas inter utrumque morbum differentias exhibet curatoria methodus. Largæ & repetitæ venæ sectiones in aliis inflammationibus tam absoluta sunt necessitatis, ut absque venæ sectionibus sanationis spes prorsus abiicienda: in variolis ut plurimum necessariæ non sunt, & sæpe sunt noxiæ; venæ sectio in inflammatione communi ad resolutionem obtinendam instituenda, in variolis ad suppurationem promptiorem & faciliorem reddendam, si inflammationis intensitas eum sicciorem & calidiorem reddat: imo absolute impossibilis in hoc casu est resolutio. In inflammationibus medicamenta refrigerantia, aquosa & diluentia sola sunt expetenda, in variolis ut plurimum fugienda; remedia æstium fomentia nocent in inflammationibus, in variolis necessaria sunt & salutaria; victus tenuis & exquisitus in inflammationibus absolute necessarius, in variolis victus paulò plenior est concedendus, & pustulis perfectè egressis, sæpe agrotantes sunt voraciores quam sanitate in ipsâ: in inflammationibus denique prodest debito tempore alvum fluidum fieri, sanguinem è naribus erumpere, sudores profusos oboriri; hæ omnes evacuationes in variolis sunt pessimæ, & si non tempestivè coerceantur agrotantium desperata salus. Uno verbo, quod inflammationibus proficuum, variolis semper adversum, saltem generatim sumptum.

I V.

QUANTUAM variolarum inflammationem sustinendam & ad suppurationem perducendam præcipiamus; procul absit ut à primo morbi insultu, ad ultimum usque diem, & omnino delapsas pustularum crustulas, remedia æstium augmentia præscribenda, oleumque igni affundendum suadere in animo habeamus. Cum in variolis sua distincta sunt tempora, sua cuicque temporis methodus

accommodanda, ac quemadmodum in tempore ebullitionis, cui regimen temperans opportunum est, fugienda sunt nimis refrigerantia, & fortius evacuantia, sic in tempore eruptionis, cui æstum foventia conducunt, ab incendiariis & calidioribus medicamentis cautè abstinendum, nunquamque magis, quam in utroque hujusce morbi tempore, locum obtinuit hoc monitum: *inter utrumque tene medio tutissimus ibis.*

Primo illo tempore quod ebullitionis appellatur, statim atque contagii variosi subtiliori halitus, & quasi spiritus rector ad sanguinis massam illapsus est, febris accenditur mitior aut ardentior, & symptomata ingruunt mitiora aut sæviora, prout erupturæ mox variolæ è discretarum, vel è confluentium genere sunt futuræ. Non tamen tam certa tamque constans hæc est differentia symptomatum variolas discretas aut confluentes præcedentium, quin vel in ipsis discretis terrificæ quandoque exurgant symptomata. Hæc febris, sive cum mitiorum, sive cum sæviorum symptomatum satellitio incedat, est semper molimen criticum, seu naturæ opus in quo omnes corporis potentix & facultates, viribus simul unitis, afflatum sanguini contagium ex ipsis sinu excutere, & ad cutem ceu ad corporis corticem expellere allaborant: uno verbo est vera crisis, vera morbi judicatio, nullamque unquam febrem agnovit sedula crifum observatrix antiquitas, cui sua crisis tam certa tamque regularis fuerit; nam semper accidit, & ferè semper eodem tempore; vixque vel levissima macularum ad cutem efflorescentium vestigia, venenum jam è sanguine segregari incipiens, proximique ejus ad cutem adventum prænunciant, cum statim febrilis ille ardor deservescit, omnisque ille symptomatum ferocium tumultus subsidit. Quodnam vero in hoc casu calcandum iter apprimè docet Hippocrates Aphorismo vigesimo sectionis primæ: *quæ judicantur, inquit, aut judicata sunt perfesse, neque moveto neque innovato sive medicamentis purgantibus, sive aliis irritamentis, sed finito.*

Hujusce Aphorismi veritatem & usum in variolis ratio demonstrat & experientia confirmat. Suscepti reverà contagii extra sanguinem expulso non potest fieri absque febre, seu absque præternaturali quodam motus circulatorii & caloris incremento, & absque quodam variorum symptomatum concursu. Si enim ultra consuetum gradum motus circulationis & calor corporis non intenderentur, vis deficeret ut impressum sanguini contagium evolveretur, & per sanguineos fluctus ad ambitum deferri posset. Symptomata verò quæ ante pustularum eruptionem superveniunt, ut vomitus, sanguinis eruptiones & alvi fluxus, si non ipsummet contagium expellunt, sunt tamen pars conaminis naturæ, cuius ope humores superfluos, & qui ipsi deinceps oneri essent, providè eliminat, ut ipsum postea contagium facilius subigat, subactumque penitus abigat. Non itaque hæc febre, hisque symptomatibus adeo terreri oportet, nam etsi gravia, necessaria tamen sunt & ut plurimum innocua, eò magis quòd ferè semper intra quartum aut quintum diem sunt quietura. Tunc vere judicatur morbus, nihilque movendum aut innovandum, nisi adeò fera sint symptomata ut imminens vitæ periculum impendat, hocque ipso in casu non nisi parçè & cautè admodum: nam si Medicus repetitis venæ-sectionibus plethoram minuere, crebris clysterum injectionibus alvi fæces eluere, validioribus emeticis ventriculum abstergere, largo refrigerantium potu calorem exstringere aggreditur, omnia susque deque miscet, naturæ molimen turbat & impedit, ipleque periculum accersit quod conatur avertere.

Quod ratio distat, confirmat experientia. Longè frequentius in divitibus &

populosis urbibus exitiales sunt variolæ quam inter ruri degentes. Quænam hæc
 dulce differentiæ causa? Non alia certè est quàm prorsus opposita curationis
 ratio. Cum quis inter rusticanos febre laborat, quam sequutura est variolarum
 eruptio, sive sit jam adultus, sive nondum pueritiam aut juveniles annos super-
 gressus, quamvis febris sit valdè intensa, quamvis gravia sæviant symptomata,
 ut nausæ, vomitus, sanguinis profusiones, alvi fluxus & alia, non statim lecto ad-
 dicitur; sive quod rustici naturaliter sunt lecti impatientes, sive quod in hoc mor-
 bo, ipsa natura ægrotos à decubitu in lecto averfos reddit, toto illo tempore rusti-
 cani libero aëri expositi remanent, etsi sæpe frigidissimo. Si tanta est sympto-
 matum gravitas, & præsertim lassitudinis, & prostrationis sensus, ut paulò majori
 quiete sibi opus esse sentiant, se quidem in lectum projiciunt, sed consuetis
 vestibus non exutos, extra linthea decumbunt; ibi non remorantur nisi quantum
 necessum est ut lassitudinem & prostrationem aliquantulum sublevent, & lec-
 tum deserunt statim atque incipit incallescere, nam lecti calor symptomatum
 ferociam adauget, præsertim vomitum & sanguinis eruptiones. Non aliis potu-
 bus utuntur quam pomaceo aut cerevisia, multà aquâ dilutis, aut lacte ebutirato
 cum aquâ permixto. Nonnunquam seri lactis è cateo molli recens effluxi hauf-
 tus aliquot assument. Sic ebullitionis tempus transigunt, nec se plerique aëri li-
 bero subducunt & in lectum recipiunt antequam jam plenè terminata sit pustula-
 rum eruptio, ipsæque pustulæ augeri & inflammari incipiant; tuncque calide in
 lecto se continent & identidem vinum cum saccharo mixtum hauriunt.

Hæc rusticorum simplex agendi ratio duo ipsis commoda affert. 1^o. Frigore
 aëris ambientis nimiam sanguinis ebullitionem coercendo, vim symptomatum in-
 fringit & impedit nè præ nimio æstu tota fere sanguinis massa in pustulas effor-
 mandas abripiatur. 2^o. Morbi tam diri & tam foedi diurnitatem & tædium valdè
 imminuit.

Quantum diversa est urbanorum curatoria methodus! Vix quispiam ægro-
 tare incipit febre variolas producturâ, cum statim ab aëre communi arceatur,
 & in lecto molli & calido includitur; dumque hæc intempestivâ cautelâ æstus
 jam ex se nimius ulterius adhuc intenditur, aliundè non magis prudenti con-
 silio sanguis repetitis venæ-sectionibus exhauritur ut tollatur plethora quæ sem-
 per, sed falsò, præsens animo fingitur, & ut præcaveatur inflammatio quæ tamen
 necessaria est & inevitabilis. Vesicatoria variis partibus apponuntur, spe mali-
 gnitatem supposititiam educendi, & quæ, si verè extiterit, non aliter certius po-
 test exhauriri quam perfectâ suppuratione; emetica & cathartica propinantur, dum
 ventriculus motu spontaneo insensam sibi saburram rejicit, & intestinis sese
 etiam sponte exonerantibus per largos alvi fluxus. Tandem post hæc venæ-
 sectiones, ut nimius calor retundatur, largus refrigerantium potus præscribitur. Sic
 ne impleta creditur hæc sacra Hippocratis lex: *qua judicantur ne moveo,*
neque innovato sive medicamentis purgantibus sive aliis irritamentis sed finito?
 En vera causa cur in magnis urbibus variolæ longè periculosiores quam inter
 rurigenas? Quoties itaque Medicus in tempore ebullitionis ad ægrotantem ac-
 ceritur, à tramite à rusticanis calcato & ab ipso Hippocrate monstrato, quan-
 tum fieri potest, nunquam recedat. Ne obliviscatur vix potentius remedium
 temperans in hoc casu posse præscribi quam pergere aëris communis frigori
 exponi; si nimia sit febris, si nimius æstus ex sanguinis redundantia ut in
 temperamentis verè sanguineis accidit, tum venam secare ne dubitet & san-
 guinem mittere, sed parè & solum quantum sufficit ut eruptioni promo-

venæ saveat; non ut plethoram necessariam auferat; quinimo si symptomata magis ex sanguinis rarefcentiâ quam ex ejus redundantâ oriuntur, omiffâ venæ-fectione, ut pote in hoc casu noxiâ, acido vitriolico in aquâ ad gratam aciditatem diluto, hæc rarefcentia compescenda, exfolutaque sanguinis principia ad se invicem revocanda. Præsentibus faburræ indicîis in ventriculo, aut cacochylæ in intestinis, si vomitus superveniat, aut alvi fluxus, sibi sunt permittendi, si modum non excedant, quod magnam noxiorum humorum copiam subtrahant; si verò excedant, aut tam diu persistant, ut humoribus plûs æquo effusis non jam relinquatur unde increfcant pustulæ, hæ evacuationes theriacâ, Diacordio, pulvere Pannonico & similibus coercendæ; si è contra non sufficient, lenioribus emeticis & subducentiis proritandæ, ut aquâ tepidâ cum oleo permixtâ & affatim haustâ, vel sero lactis cui cassia incocta fuerit aut in quo mel rosaceum, aut violaceum fuerit dilutum. Nunquam, aut raro validioribus utendum, ne partibus internis valdè irritatis & præternaturaliter incallescensibus vera & exquisita inducatur inflammatio.

Tempore eruptionis cum eò melius eant res ægotantis, quò magis assurgunt & plenius turgent pustulæ, & quò plenior succedit pustularum suppuratio; cumque nullâ aliâ viâ quam supuratione venenum ad cutem depositum omnino extra corpus possit extrudi, hæ eruptio est ipsissimum naturæ opus ac proinde semper fovendum, nam quò natura vergit, eò semper eundem, & ut inquit Hippocrates, Aphorif. 21. sect. 1. quæ educere oportet, quò maxime vergunt, eò ducenda per loca convenientia. Sed hæ eruptio non iis fovenda quæ ignem igni adjiciunt, quæ naturæ opus turbant, sed iis quæ motum & calorem necessarium sustinent. Is omnino servandus est modus quem in aliis evacuationibus criticis & salutaribus religiosè servandum præcipiunt Medici. Sic, verbi gratiâ, sudore critico in morbo inflammatorio tempestivè erumpente, cautus Medicus salutarem hunc sudorem sustinet, calore lecti, potu leni tepido & parcè sumpto, aëre cubiculi moderatè calido & similibus, neque hunc ultra modum augere nititur remediis caloris ignei, nec hunc rursus impedit frigore incautè admisso, venæ-fectione intempestivâ aut aquæ frigidæ potu: sic omnino agendum in fovendâ variolarum inflammatione, iis tantum additis quæ huic morbo peculiariter conducunt.

Post ebullitionem absolutam, pustulis eminere incipientibus, æger in lecto molli & calido retinendus, & levibus ac simul calidis stragulis contegendus ut à frigore defendatur & in calore naturali paulò superiore conservetur. Nunquam spiraria lecto circumducantur, aërem enim putridis & fœtidis halitibus refertum circâ ægotantem retinent. Imo semel aut bis in die fenestris paulisper apertis in cubiculum exterior admittatur aër. Sic interior renovatur, vividior & respirationi opportunior redditur.

Potus sit leviter expellens & sudorificus, ut decoctum radicis scorfonæræ, cum floribus papaveris erratici, aut decoctum lentium cum pauco cinnamomo contrafacto & tantillo sacchari, aut similia.

Juscula sint magis nutrientia quam in aliis inflammationum speciebus, præsertim si adit fames, & variolæ sint è discretarum genere.

Pulveres diaphoretici semel aut bis in die ad scrupulum unum, aut drachmam semissem exhibeantur, conflati ex absorbentibus & parcissimâ quantitate sulphuris aurati antimonii, cujus tota dos in singulos dies granum semi aut granum integrum non debet transcendere, sicque septem aut octo diebus pergatur. Hoc medi-

camentum non alterum sibi par habet in hoc morbo; id enim præ cæteris omnibus habet commodi quod efficacissimè & tamen pacatissimè à centro ad cutem propellat, nec æstum & calorem periculosè augeat ut pleræque potiones cardiacæ, & vinum, tam sicerum quam cum aromatibus & saccharo permixtum, adeoque vel in ipsâ febre pustulis imperfectè erumpentibus tutò exhiberi potest absque metu & periculo febris adaugendæ.

Si segnitùs progreditur eruptio, ob vires exhaustas & nimium languidas, potiones cardiacæ ex aquis aromaticis & spirituosiss cum antimonio diaphoretico, pulvere viperarum, croci aultriaci granis aliquot & saccharo compositæ, vel vinum sicerum calidum cum paucò saccharo exhibeantur.

Tenuis & exquisitior diætâ non nisi ægotantibus quorum vires per morbi violentiam nimium oppressæ opportuna est. Imò hujus modi ægotantes nutriendi quidquid abhorrent & respuunt, solamque pitisanam si grata fuerit aut cochlearia aliquot potionis cardiacæ grati etiam saporis in omne alimentum admittunt donec ex hoc misero statu paululum emerferint.

Sed pustulis probè egressis si importuna fames cruciet ægotantes, fugienda tenuis & exquisitior diætâ victusque paulò plenior concedendus, non qui famem expleat, sed qui ipsam retundat & temperet: *non fames, non satietas, neque quicquam aliud quod naturæ modum excedat bonum inquit Hippocrates.* Aphorif. 4. sect. 1.

Felix curatricum imprudentia, quæ importunis ægotantium precibus victæ, ipsi quandoque victum pleniorum furtim concefferunt, multoties docuit hunc non his ægotantibus noxium, sed valdè utilem & absolutè necessarium esse, nam ægri, qui prius fame exhausti miserè peribant, longè melius postea habuerunt, ipsis etiam valdè stupentibus medicis. Quid reverà tam tenui, tamque exquisitâ diætâ opus est in morbo cui certus quidam plethoræ gradus semper necessarius est? Quis non sentit tam severam diætâ gravissimam & intolerabilem his esse qui, eruptione plenè peractâ, integrâ ferè sanitate fruuntur, & qui fame eo acriori torquentur quod ipsorum corpus, tempore ebullitionis, per profusas evacuationes & omnimodam alimenti abstinentiam jam exhaustum est. Hæc inexhausta fames vires deiecit, pustularum maturationi officit, somnum arceat, anxietatem, debilitatem & ipsam mortem sæpè affert. Tristes hos scopulos effugissent Medici, si Hippocratis oracula minus oblivioni tradidissent. Ab ipsius ore didicissent pleniorum in morbis victum concedendum cum remissiores sunt: *tantum à tenui victu recedendum, inquit Hippocrates, Aphor. 7. sect. 1. quânto morbus remissior extremis fuerit.* Nihil itaque incommodi, sed multum utilitatis potest exurgere ex paulò pleniori victu ægotantibus in variolis concessio: paulo plenior victus, si adit fera fames, omnium cardiacorum tutissimum & efficacissimum est.

Dum pustulæ variolosæ intensissimè inflammantur, tantus in toto corpore dolor diffunditur, præsertim si variolæ sint confluentes, ut immanem spirituum tumultum inferat, & somnum irripere non sinat. Tantum dolorem obtundere oportet, nam febrem accersit. *Dum pus sit, inquit Hippocrates, dolores & febres accidunt magis quam confectio.* Aphor. 47. sect. 2. Syrupus de Meconio & variæ præparaciones ex opio desumptæ hunc periculosum tumultum compefcunt, si tempestivè & debitâ quantitate singulis diebus sub vespèram exhibeantur; nam dolorem obtundendo somnum prius fugientem revocant & pustularum maturationem promovent.

Hic locus est insurgendi in usum seu potius in abusum vesicatoriorum. Qui unquam factum est, ut tam dira consuetudo admissa fuerit? Quid? In morbo cuius maxima sævities oritur ex dolore acutissimo per totum corpus diffuso in tempore quo pus fit, & in quo dolores & febres accidunt magis quam confecto, absque ulla dubitatione, absque ullo poenitendi metu, vesicatoria, & quidem larga, modò alteri, modò utrique tibie apponuntur? Quonam ergò consilio? Nùm exhauriendæ malignitatis? Quænam alia malignitas in variolis quam pustularum acutè inflammatarum numerus, magnitudo & dolor acutissimus; & quænam aliâ viâ plenius exanthlari potest quam suppuratione? Nùm ut humoris variolosi portio per vesicatoriorum aperturam effluat? sed humor ille qui per lacera avulsæ cutis vascula effluit est mere serofus, non purulentus; imò si quid puris efflueret, metuendum esset ne, humore necessario subducto, pustularum deficeret eruptio, aliundè contagium variolarum nullâ aliâ portâ è corpore egreditur quam suppuratione; nùm caloris adaugendi? Sed in hoc casu jam plus caloris adest quam requiritur; & in calidis affectibus, vesicatoriis uti nefas. En sapiens effatum Aëzii de vesicatoriis: *In calidis & siccis affectibus vesicatoriis non utor, inquit, per vesicantium enim stimulos major in fluidis fermentatio, turgescencia & orgasmus excitantur, & in solidis vividior oscillatio.*

Vesicatoria ergò in variolis, generatim loquendo, nunquam conveniunt. Unus tantùm casus excipiendus, quandò nempe ob fractas & exhaustas vires per nimias & nimis repetitas ante eruptionem venæ sectiones, vel eruptio torpescit, vel pustulæ jam egressæ subsidunt & recedere videntur, nullo calore, & nullâ febre apparentibus, tunc natura deficiens ad se revocanda. In hoc casu vesicatoria felici cum successu possunt admoveri.

Sed, præter superius recensita vesicatoriorum damna, aliud adhuc vitium ipsis potest exprobari. In variolis prosperè suum cursum absolventibus, urinæ quas ægrotantes reddunt paulo post mictum crassæ & turbidæ fiunt; sive ob inductionem intestinis calorem, & alvum stridiorum redditam, sive ob partem veneni variolosi per urinas simul exeuntis; quidquid sit, hæ urinæ cum ægri levamine semper rejiciuntur. Si applicantur vesicatoria, urinæ non ampliùs post mictum turbidæ & crassæ fiunt; crassiores & noxiæ humorum partes non ampliùs per renes transcolantur, ob vim propriam & peculiarem quâ cantharides, ex quibus constantur vesicatoria, in renes præsertim agunt, & ipsis erethismum quemdam inducunt. Hinc in sanguine remanet, aut in ipsum refluit crassa & cruda materies, quæ modò in hanc modò in illam partem irruit, postque morbum, varia affert incommoda, quibus diù adhuc ægri conflantur, ut tubercula in variis partibus, tusses, spirandi difficultates, ulcera, ophthalmiæ.

Nonnè tot mala ex vesicatoriis erumpentia plus quam sufficiunt ut à variolis absolute exulent?

Varia in variolis superveniunt symptomata quæ sigillatim recensere non hic necessum est, & quibus singulis sua propria curatio accommodanda, sed nunquam obliviscendum morbum principem nimis refrigerantia, & horum, diuturniorum usum non admittere.

Hæc sunt medicamenta, hæc est curatoria methodus quibus utendum est in curandâ variolarum inflammatione; si quis verò hanc methodum hæcque remedia cum remediis & methodo in inflammatione communi adhiberi solitis conferat, has methodos à se invicem omninò esse diversas ultrò fatebitur.

NON deerunt quibus hucusque allatæ rationes, propositaque curandi methodus non arridebunt. Obijciunt novum non esse variolas pro crisi habitas fuisse quâ natura venenum sibi infensum è sanguine expellit. Nec nos ipsi diffitebimur; sed Medici celebriores & nominatim Rhases hunc morbum inter inflammatorios annumeraverunt, curationemque inflammationi communi idoneam huic attulerunt. Sic totam hanc crîsim totumque ejus effectum in solâ pustularum eruptione reposuisse & inclusisse videntur, ipsamque pustularum inflammationem non pro *inflammatione-crisi*, sed pro inflammatione communi habuerunt. Hoc est quod novum est, quodque accuratè observandum fuisset ut hæc inflammatio semper foveretur & ad suppurationem perduceretur. Sed quid tum adjiciant? Non indè sequitur regimen calidum huic morbo esse opportunum, nam jam olim adhibitum fuit; sed tot tantasque strages edidit ut ætate Sydenhamii relictum fuerit. Nec nos ipsi regimen absolute calidum stabilire annitimur; sed tantum temperatum, & æstui fovendo, non verò præter modum augendo idoneum. Si tempore Sydenhamii regimen calidum tot tantasque strages edidit, id non evenit quòd regimen calidum ex se malum sit, sed quòd perverse adhibitum fuerit. Est modus, sunt certi fines in rebus & præsertim in usu medicamentorum. Ceterum hoc regimen calidum non statim post observatas & cognitatas variolas adhibitum fuit, sed regimen refrigerans ab ipso Rhase edoctum; verò experientiâ rerum magistrâ docente, tam infensum tamque contrarium huic morbo repertum est, ut quasi unanimi consensu deinceps relictum fuerit, & ante Sydenhamium nullum aliud regimen in usu erat quam calidum. Cum tamen hoc ipsum regimen in extremum regimèni frigido prorsus oppositum sæpè impingeret, sæpè etiam exitiosum factum est.

In vitium ducit culpæ fuga si caret arte.

Non tam acriter Sydenhamius in calidum hoc regimen insurrexisset si cautius usurpatum fuisset.

Rejiciunt adversarii: hoc responsum nihil solvit, nam innumeri è variolis feliciter evaserunt quibus non aliud regimen quam refrigerans adhibitum fuit. Quid indè? Num ex eo quòd omnes qui in periculosos scopulos alliserunt, non perierunt, omnibus feliciter navigare cupientibus in eisdem scopulos erit allidendum? Regimen refrigerans naturæ adversum est; non ducit quò natura vergit. Sed regimen calidum, si moderatum, naturæ amicum, & alteri cuilibet anteponendum, quòd inceptam crîsim foveat & ad optatum finem perducatur.

Uterius iniquit adversarii: regimen refrigerans huic morbo tam idoneum est ut illud non solum commendaverit Boerhaavius, sed asserere non dubitaverit « perfici debere illam methodum quæ deprehensa est valere in omni morbo inflammatorio, eo usque ut in hoc morbo impediatur ne inflammatio in pus abeat, » cum in aliis omnibus succedat, hicque nihil repugnet, & morbus variolosus sæpè sit sine variolis ». Sed non attendisse videtur Boerhaavius variolarum eruptionem esse veram & exquisitam crîsim; & crîsim impedire; idem esse ac mortem inferre. Nonne ægrosantem occideret quisquis sudoris sudoris critici coercendi aut supprimendi causâ venæ-sectionem imperaret; aut frigidam affatim præberet hauriendam? Idem omnino accideret si quis variolarum suppurationem supprimere aggrederetur. Non magis rationi consonum videtur variolarum suppurationem ungquam tuiti, & absque periculo impediri posse, quam mulieres ætate florentes ab

importuno, & tamen critico salutari menſtruorum fluxu poſſe unquam immunes reddi ſanitate illæſâ. Si unquam morbus varioloſus fuit abſque variolis non indè meliùs habuerunt ægrotantes, nam aut vitam amiſerunt, aut non niſi languidam morbidam & ſolito breviorẽ retinuerunt. Aliunde, ut vulgò dicitur, *rara non ſunt artis.*

Nec magis admittenda eſt altera huiſce celebriſ Medici opinio, quã ſperat fore ut aliquando quoddam ſpecificum inveniatur tantæ ſubtilitatis & viſ tam penetrantis, ut venenum varioloſum delere poſſit ſtatim atque ſanguini impreſſum fuerit. Contagium varioloſum non ſolum eſt ſubtilis halitus, ſed motu & calore vitali pollet dum ab inſecto in ſanum avolat ut ſemen in actu venereo emiſſum. Quãnam ergo arte præparari unquam poterit antidotus tam ſubtilis ut merè halituoſa ſit & quaſi immaterialis, tam vivæ actionis ut contagii varioloſi celeritatem & mobilitatem ſuperet, ut tandem ipſamet ſit quaſi ſpecies altera contagii? Quã arte, quibus in vaſis retineri poterit? Quomodo capi, ponderari, applicari? Hæc opinio eſt fortè pium deſiderium, ſed præterea nihil.

Ergo tandem inquit & refrigerantia & venæ-ſeſiones impoſterùm à curatione variolarum omninò erunt ableganda? minimè. Sed in quibuſdam tantùm caſibus erunt admittenda, non ſub titulo regulæ generalis, ut priùs factum eſt, ſed tantùm ſub exceptionis titulo & cum neceſſitas poſtulerit.

*Ergo variolarum inflammatio ab omnibus aliis diverſa, quod ſit INFLAMMATIO-
CRISIS, ac proinde ſemper fovenda & ad ſuppurationem perducenda.*

DOMINI DOCTORES DISPUTATURI

- | | | |
|--|--|---|
| <i>M. Antonius - Laurentius DE
JUSSEU, Regiæ Scientia-
rum Academia Socius, &
Regiæ Societate Medicâ Pari-
ſienſi pro Epidemiis inſtitutâ.</i> | <i>M. Claudius LAFASSE, è
Regiâ Societate Medicâ Pari-
ſienſi pro Epidemiis inſtitutâ.</i> | <i>M. Dionyſius PAUTIER DE
LAREVILLE, S. Comitii
Gallo - Provinciæ Medicus
Primarius.</i> |
| <i>M. Joannes-Jacobus NOLLAN.</i> | <i>M. Joſephus-Ignatius GUIL-
LOTIN.</i> | <i>M. Natalis-Andreas-Joannes-
Baptiſta CHESNEAU.</i> |
| <i>M. Benjaminus Michael SO-
LIER DE LA ROMILLIAYS,
Aſtronomus & artis obſervatæ
in Matronarum Profeſſor.</i> | <i>M. Carolus-Jacobus-Ludovicus
COQUEREAU, Scholarum
Profeſſor, è Regiâ Societate
Medicâ Pariſienſi pro Epi-
demiis inſtitutâ.</i> | <i>M. Dionyſius-Claudius DEVE-
CEY.</i> |

Proponebat Pariſiis JOANNES-FRANCISCUS MARINIER;
Nivernenſis, Saluberrimæ Facultatis Pariſienſis
Baccalaureus Medicus, A. R. S. H. 1777.
A SEXTA AD MERIDIEM.

Typis QUILLAU, Univerſitatis & Facultatis Medicinæ Typographi, 1777.